

E buki "Manchi" ta worde presenta mañan

Na cuminsamento di e luna aki **Helena Engelbrecht -Fornara** a presenta su buki di poesia "**Manchi**" na Hulanda, ya cu e buki a wordo imprimi na Hulanda y e mes tabata eynan pa asuntonan di salud y familia.

Mi a bin haya sa cu mañan anochi e ta presenta e buki na Aruba na **Arubiana den Bachstraat pa 8 or anochi** y sigur mi lo ta presente.

Mi sa di e poesianan di e autora y ta 185 el a skirbi pa e buki, di cualnan 42 a wordo escogi pa e publicacion.

E buki aki ta un buki skirbi cu hopi emocion y e poesianan ta conta mas bien su sentimentonan pa su esposo "**Armand "Manchi" Engelbrecht** y ta trece recuerdonan dilanti.

Esnan cu conoce Lenie, manera e autora ta ser yama y e bida cu el a hiba como esposa di Manchi, ta mira den e poesianan e "**Love story**" cu ta apto pa un reparto cinematografico.

Mi a conoce Lenie for di chikito como cu su tata tabata un di nos maestronan di school.



El a biba na San Nicolas den **Marnixstraat**, tambe den **Bernhardstraat** pabao di unda awe ta **Julio's** y despues familia Fornara a bay biba na **Savaneta**.

Lenie a siña conoce **Manchi Engelbrecht** tempo cu e tabata bay scol na **Playa** y den mes bus cu **Manchi**.

Ta un dia un otro hoben den bus a causa un problema den bus y chauffeur di bus a dicidi di saca **Manchi**, esun inocente, for di bus.

E dia ey wowonan di **Lenie** a keda claba riba **Manchi**.

Cu su 18 aña **Lenie** a bay Hulanda pero semper cu e nostalgia di bolbe Aruba.

El a bolbe Aruba na varios ocasion pa por a mira **Manchi** atrobe Pa un coincidencia despues di hopi aña el a bin den contacto atrobe cu **Manchi**, pero a keda aleha amorosamente ya cu **Manchi** tabata casa y cu un amiga cu tabata bisiña di **Lenie**.

E contacto no tabata pa mucho tempo tampoco, y añanan a pasa te cu **Manchi** a drenta den politica na Aruba y mientras tanto tambe su esposa a fayece.


Ta un dia na Hulanda el a haya yamada di **Manchi** y nan a tumá contacto cu otro un biaha mas.

Pero a sali afo tambe cu for di dia cu el a mira **Manchi** den bus prome biaha, e nunca a lubida e hoben aki y **Manchi** tambe a bin expresa e sentimentonan cu e tabatin pa **Lenie** for di e tempo ey.

Despues di un noviasgo nobo - **Lenie** tabata divorcia - nan a casa y a biba masha feliz cu otro.

E BUKI "MANCHI"

Por bisa cu e buki di poesia aki ta un homenahe na **Manchi** y manera **Lenie** ta bisa: tur cos na Aruba y hasta na Hulanda ta ponemi corda riba dje; e añanan cu nos tabata hunto; e lucha contra su malesa y e perdida di su amor grandi.



Den e buki, no ta solamente **Manchi** ta haya bida atrobe pero tambe Aruba, e isla riba cual nan a pasa momentonan mas feliz di nan bida.

"E tey y e no tey den e holo di su camisanan of holor di cigar, ora cachonan ta yora y cana riba su graf na **Sabana Basora**. Hasta ora e mira den wowo di un lagadishi, scucha "nan" **Vallenato** of pidi pa un pan cu bakijouw na truck **Papillon**", e publicador menciona di e buki.

Ora lesa e poesianan di **Helena "Lenie" Engelbrecht Fornara** den e buki, ta como si fuera bo ta lesando un historia di Amor cu por wordo compara cu hopi novela y storianan real di "**amor eterno**".

Poesianan cu ta relata di nan bida feliz y tambe e sufrimento cu a bini despues pa **Lenie** cu fayecimento di **Manchi**.

Lenie, un señora fuerte, cu despues a pasa den un periodo pisa cu un desgracia cu casi a lague inmovil, cu awe e ta canando cu "**boots**" special y cu un kruk, despues di a pasa den operacionnan masha doloroso.

Keha.....?

No **Lenie** no ta keha, y e ta usando e lema cu ami semper a usa: "**Pakico keha si tin hendenan den situacionnan peor cu mi y cu no ta keha**".

E portada di e buki cu personanan hungando domino ta un indicacion di e atardi y anochinan cu **Manchi** ta pasa na **Zeerovers** na **Savaneta** pa hunga domino cu su amigonan.

E portada ta musta tres di su amigonan na mesa y un stul bashi cu sombre di **Manchi**.

Mi ta desea **Lenie** hopi exito cu su buki y kier usa aki palabranan di Ministro plenipotenciario **Edwin Abath** dia di presentacion di e buki na Hulanda. "**Mi ta spera cu e buki aki por brinda e consuelo na otroonan cu a haya falta di personanan stima**" den nan famia.

Riba e potretnan por mira **Lenie** mey mey cu su tata y rumannan tempo cu e tabata mucha na Aruba, y tambe potret di dia cu el a casa cu **Manchi**.

DIARANZON MARCO CHRISTIAANS TA PRESENTA "E SCHUTTER"

Diaranzon Marco Christaans ta presenta su buki "**E Schutter**". Esaki lo ta na **Biblioteca Nacional Aruba** pa **7.30 or anochi**.

Un buki basa riba bida di e schutternan di Aruba cu anecdotanen basa riba loke e schutternan di nos isla a pasa aden durante di dos guerra mundial y cu expresionnan cu ta claramente e "**idioma**" di esnan den kazerne.

Por corda ainda e exito grandi cu **Marco** tabata tin cu "**Perseverancia**" basa riba bida di nos piscadornan di antes y e peligernan cu nan tabata pasa aden riba lama y con nan familia ta bao di presion diariamente sperando e botonan drenta atardi of anochi.

Mi ta kere cu den "**E schutter**" lo por haya lectura agradable y cu ta tenebo cautiva pagina pa pagina, mescos cu "**Perseverancia**", considerando e estilo di **Marco**. Mas despues lo mi elabora riba e buki aki tambe. Un cu mi ta sigur lo bira un "**bestseller**" basa riba locual mi sa caba di dje.

Juby Naar.

